

**Oqaasiliortut ataatsimiinnerannit
ataasinngorneq maajip 30-anni 2011, nal. 10.00
Ilimmarfimmi / Oqaasileriffimmi
imaqarniliat.**

Peqataasut: Carl Chr. Olsen, Stephen Heilmann, Eva Møller Thomassen, Lotte Holm.

Peqataanngitsoq: Johannes Jerimiassen

Oqaluuserisat:

1. Tikilluaqqusineq aamma **ilisimatitsissutit**

Siulittaasoq tikilluaqqusivoq ilisimatitsissutigalugulu ataatsimiinnermi matumani immikk. 3 aamma 4 pingaarnertut sammineqassasut.

Aammattaaq aalajangerneqarpoq eqqartugassat marlunnik ilaneqassasut:

6. Tusagassiuutit pillugit nassuiaat, aamma 7. Højesteret-ip nutserisoqarneq pillugu aalajangigaa.

2. Kingullermik ataatsimiinnermit imaqarniliap akuerineqarnera

Imaqarniliaq ilaasortanit naqqiissuteqarfigineqareersoq akuerineqarpoq

3. Nordisk Sprog møde Ilulissani

Lisathe Møller Kruse siulittaasorlu ataatsimiinnissamut piareersaatit assigiinngitsut pillugit ilisimatitsissuteqarput. Ilaatigut ataatsimeersuarnermi programip missingersuusiornera, peqataasussat 42 missaaniittut, hotelit assigiinngitsut pingasut Ilulissani atorineqassasut aammattaaq aningaasartuutit qanoq annertutigissanersut, kikkut aningaasaliisuusimanersut aammalu NAPA-mut NunaFondimullu aningaasanik tapissutissanik qinnuteqartoqarsimasoq.

Siunnersuutigineqarpoq nerersuarneq Naalakkersuisumut akilerneqarsinnaannginnersoq apeqqutigineqassasoq.

4. Nunavumiit tikeraartussat

Allatsi ilisimatitsivoq pilersaaruserneq ingerlaleruttortoq. Taiguusiliuqtiit sulisui marluk Jeela Palluq-Cloutier aamma Pascal St-Jean

Oqaasileriffimmiunut malinnaassapput sap. ak. ingerlanerani. Manna

tikillugu pilersaarutit imaapput: juunip 7-iat: oqaatsit pillugit teknologimik suliaqartut malinnaavigissavaat. Juunip 8-at Nunat Aqqinik Aalajangiisartut malittarissavaat. Juunip 9-at Inuit Aqqinik Akuersisartut aqqillu pillugit suliat malittarissavaat. Taakku tamarmik siunertaraat suleriaatsivut, katerseriaaserput qanorlu tamakku ingerlateqqinneqartarnersut paasiniaavigissallugit. Taiguusiliuqtinut ilaasortat Oqaasiliortullu juunip qulingani ataatsimeeqatigiissapput. LHO nunat aqqinik nalunaarsuiartorluni angalassagami peqataasinnaanngilaq, SH ilimasaarivoq allanik suliaqarami takkutinneriataarsinnaalluni, taamaattoq naatsorsuutigalugu peqataanissi. Karl Møller sinniisutut peqataasinnaanersoq aperineqassaaq. Oqaasiliortunut ilaasortat ataatsimiinnermi sammisassaqqissutut makku taavaat:

1. Nunavup iluani oqaatsit pillugit oqartussaassuseq isumannaaqqullugu kaammattorneqassapput.

2. Ilinniartunik atorfinitsitsisarnissaq kaammattuutigineqassaaq,

3. Taaguusersuinnermi assigiissaarinnissaq kaammattuutigineqassasoq.

4. Ilisimatitsissutigalugu taaguutit tasamani atorineqartut ilaatigut

Oqaasiliortunit Nunatsinni atugassanngortinneqartartut.

Aalajangerneqarpoq ataatsimeeqatiginerat pissasoq tallimanngornermi juunip qulinganni nal. qulinut Oqaasiliortut ataatsimiittarfianni.

5. Mittarfeqarfinnut allagartalersuisarneq pillugu saaffiginnissaagut?

Allagartalersuisarneq eqqarsaatigalugu assigiissumik periaaseqarnissaq siunertaralugu Pia Lyngemut Ane Marie Sakariasenimullu allakkamik missingersuusiamik allatsi piareersaassaaq, allagartalersuisarnermut tunngassutillit oqaatsitigut politikkip allannguutissaa siunertaralugu suliaqarmata apeqqut tassunga tunngasoq aamma ilanngunneqarsinnaaqullugu. Periarfissaqarpat Katti Frederiksenip Llisathe Møller Krusellu allagartalersuisarneq pillugu assilisaat ilanngullugit.

6. Tusagassiuutit pillugit nassuiaat

Tusagassiuutini suliaqarnermi qallunaat oqaasiisa salliutinneqarpallaarnerat isumaliornartutut oqaatigineqarpoq oqaatsittalu tusagassiuutini atorineqarnerannut innarluttumik sunniuteqartarnera

taakkartorneqarluni. **Oqaasiliortut isumaqarput tusagassiuutinik sammisaqartut erseqqissumik oqaatsitigut politikkeqarnissartik aalajangiuttariaqaraat.**

Tusagassiuutit pillugit nassuiaammi oqaatsit pillugit innersuussutit 2001-imi Oqaatsinut politikkimik nassuiaasiornissamik suleqatigiit innersuussutaannut naapertuuttutut nalilernerqarput. Assersuutigalugu:

- Oqalutsinngorniat nutserisunngorniallu ilinniartitaanerit ullutsinnut naleqqussartariaqarpoq aamma
- translatoritut ilinniarnep Nunatsinni ingerlanneqartarnissaa siunersuutigineqarpoq.
- "Oqallorissarfik" Oqaatsinik Pikkorissarfiup ataaniissinnaasutut oqaatigineqarpoq.

Inassutit sisamaannut "Oqaasileriffik Ilinniuseriffillu ordbogiliornermi suleqatigiissasut", eqqaaneqarpoq suleqatigiinneq ingerlasoq, taamaattoq ilaannikkut ordbogiliat Oqaasiliortut avaaqullugit pisartoq, tamannalu attuumassuteqartunut erseqqissaatigineqassasoq.

Oqallorissarfik eqqartorneqartillugu SH isumaqarpoq makku pimoorullugit tamanut tusarliunneqartariaqartut:

Naqissusineq atornagu *erseqqissaaneq* atorneqartassasoq.

Oqariartuut pinnagu *saqqummiussineq* atorneqartassasoq.

Aallaavigalugu pinnagu *tunngavigalugu* atorneqassasoq.

7. Højesteret-ip nutserisoqarneq pillugu aalajangigaa

Piffissami tusagassiuutitigut sammineqarpoq højesteretip aalajangiivigisimasaa, tassa unnerluutigineqartut kalaallisut danskisullunniit suliap ingerlatinneqarnissaanik periarfissartik atorsimannngikkaangassuk kingorna unnerluussissutip kalaallisut nutsernera pissarsiariniarsinnaannngikkaat.

Eqqartuussisarneq pillugu isumalioqatigiissitat suliaata kinguneranik nunatsinni kikkullunniit piumasarisinnaavaat kalaallisut danskisullunniit suliaq ingerlanneqassanersoq piumasarisinnaallugu. Oqaatigineqarpoq ikittuinnaat periarfissaq tamanna atortaraat, tassa kalaallisut ingerlanneqarsinnaanissaa piumasaralugu.

Oqaasiliortut isumaqarput tamanna allanngortinneqarsinnaasariaqartoq, ilaatigut makku tunngavilersuutigalugit:

Unnerluutigineqartoq pineqaatissinneqartorluunniit kinaluunniit oqaatsit nammineq naammattumik paasinngisani atorlugu pineqarsinnaanngilaq, tamanna pisinnaatitaaffiit pillugit isumaqatigiissutinik uniuinerussaaq. Oqaasiliortut isumaqarput kinaluunniit suliap aallartinnerani danskisut suliarinissaanik akuersisimagaluarluni suliap ingerlateqqinnerani inatsisitigut pisinnaatitaaffitsigullu paasiuminaatsoqarsinnaanera pillugu aallaqqaammut suliaq oqaatsit suut atorlugit ingerlannissaanik aalajangersimaneq oqaatsit taakku tamaasa pisinnaatitaaffigamigit arlaannut atortitsisinnaaneq nuunneqarsinnaasariaqartoq. Eqqaaneqarpoq politiit aamma sillimmasiisarfiit suliaqarnerminni annerusumik suliat danskisut ingerlanniartaraat. Taamaattoq tamakku pillugit Nunatta Eqqartuussiviata inatsisitigut illersugaanerup isumannaatsuunissaanut oqaatsit pingaassusiannik nalunaarutaa Oqaasiliortut tamakkiisumik tapersersorpaat. Oqaasiliortut aamma innersuussutigaa Oqaatsinut politikimik nassuiaat "...oqaaserli" suliarineqarmat inatsisitigut immikkut paasisimasalittut naliligiisitsisimanerup imarisai innersuussutigineqarput, immikkut erseqqissarlugu "Naalagaaffiit isumaqatigiissutaasa isumaqatigissutigineqarneranni immikkoortoq 26-mi imatut aalajangersagaqartoq:

"Isumaqatigiissut sunaluunniit atuuttoq tassunga ilanngussimasunut pisussaaffiuvoq takkunangalu isumaqatigiissutip anguniagaa allanngortinngilluinnarlugu naammassineqassalluni." (Enhver ikraftværende traktat er bindende for dens deltagere og skal opfyldes i god tro.)

Isumaqatigiissutit pineqartut aamma oqaatsinik atortitsinermut tunngasut arlallit pineqarmata tamanna pisortanit malinnaaffigilluinnartariaqartoq isumaqarfigineqarpoq, allaat arajutsisimasaraqarpat ikiorlugit.

SH-p erseqqissaatigaa aamma tassani suliffeqarfinni oqaatsit pillugit politikkeqarnissaq eqqartuussivinni aamma Naalagaaffiup ingerlassaanni atuuttariaqartoq.

8. Allat

Tulliani ataatsimiinnissaq

Tallimanngornermi juunip qulingani qulinut ingerlanneqassaaq. Tassani ataatsimeeqatigineqassapput *Nunavumi Taiguusiliuqtit*. Ilaatigut eqqartorneqassapput inukitut taaguutit kalaallit atulersimasat.

Ilisimatitsissutigineqarpoq Nordisk Sprogmoderqartoqareerpat aggustusip 26-anni utimut aallartoqassasoq. Oqalugiartussat tunuliaqutaat pillugit allaatigisat SH-mut aqutsisuunermini atugassaatut piareersarneqassapput (LMK).

Carl Chr. Olsen
Siulittaasoq

Nuka Møller
Allatsi